

Ս. ՏԵՐ-ՂԵՆԳՅԱՆ

ԴՎԻՆ ՔԱՂԱՔԻ ԺԱՄԱՆԱԿԱԳՐՈՒԹՅՈՒՆԸ
9—10-րդ դարերում

Ը դարի վերջից Դվինը դադարեց արաբական խալիֆայության Արմինիա կուսակալության միակ կենտրոնը լինելուց: 789 թ.¹ սկսած Արմենիա կուսակալության ոստիկանի հիմնական նստավայրն էր համարվում նաև Պարտավը (արաբ. Բարգաա): Դվինն այդ օրվանից դարձավ երկրորդական նրստավայր: Թ դարի սկզբին, երբ խալիֆայության զանազան մասերի մեջ սկսեցին խլրտումներ, Արմինիա կուսակալությունը, նույնպես, անմասն չմնաց բնդհանուր շարժումից: Ջահհաֆյան ամիրաները սկսեցին մի ուժեղ շարժում, որի նպատակներից մեկն էր նաև Դվինի գրավումը: Բայց այդ շարժումը ձախողվեց ոստիկանների և հայ Բագրատունիների միացյալ ջանքերի շնորհիվ:

861 թ. սպանվեց Մութավաթթի խալիֆան և սկսվեց մի նոր շրջան, երբ Դվինը կուլախնձոր դարձավ երկու ուժերի՝ հայ Բագրատունիների և զանազան մահմեդական ամիրաների միջև:

1. ԴՎԻՆԸ ԲԱԳՐԱՏՈՒՆԻՆԵՐԻ ԿԱԼՎԱԾ (862—894)

Երբ Մութավաթթին սպանվեց, միանգամից թուլացավ խալիֆայության Աշտուն ամբողջ Անդրկովկասում: Դրանից հետո Բաղդատից ուղարկված ոստիկանները լուր պաշտոնյաներ էին, որոնք հավաքված հարկերը փոխանցում էին խալիֆային: Երևի այդ է պատճառը, որ այս շրջանի աննշան ոստիկանների ցուցակը միշտ էլ մնում է անկատար²: 862 թ.³ սկսած Հայաստանի, Քարթլիի և Առանի (Աղվանք) հարկերը⁴ հավաքում էր իշխանից իշխան Աշոտ Բագրատունին: Նույն այդ ժամանակ Շիրվանում ինքնագլուխ սկսեցին իշխել մադիադինները, իսկ Դերբենդում հաշիմիները⁵:

Այս շրջանում Դվինը դեռ մնում էր որպես վարչական կենտրոն, Պարտավի հետ միասին: Թուլմա Արծրունին հիշում է ոստիկան՝ Հալթի որդի Ահմաթի (Մուհամմեդ իբն խալիդ)⁶ գալուստը Դվին՝ հարկերը հավաքելու⁷, նա պատմում է, թե ինչպես Պարտավի և Մանադկերտի ամիրաները նոր ոստիկանի հետ դավեր են նյութում Աշոտ Բագրատունու դեմ: Եթե այդ ժամանակ

¹ Հայ ժողովրդի պատմություն, Երևան, 1951, էջ 150:

² Տես նորագույն ցուցակը՝ Հ. Նալբանդյան, Արարացի ոստիկանները Հայաստանում, ԳԱ Տեղեկագիր, 1956, № 8:

³ K. Mlaker, Zur Chronologie Asots I, Հանդէս Ամսօրեայ, 1927, նոյ.-դեկտ.:

⁴ Կուլամա. Bibl. Geogr. Arab. ed. de Goeje, pars VI, էջ 246:

⁵ Очерки по истории Азербайджана, Изв. АН АзССР, 1946, № 1.

⁶ Հ. Նալբանդյան, Արարացի ոստիկանները Հայաստանում, ԳԱ Տեղեկագիր, 1956:

⁷ Թ. Արծրունի, Պատմութիւն տանն Արծրունեաց, Թիֆլիս, 1917, էջ 252—254:

Դվինում լինելու տեղական ամիրա, ինչպես՝ և կարող էր նա բուրբուխներ բերան չղալ մի այնպիսի ժամանակ, երբ նոր ոստիկանը հենց Դվին էր գալիս:

Աշոտ Ա-ի թե՛ իշխանության, թե՛ թագավորության շրջանում Դվինում ղեռ գործում էր արաբական փողերանոցը: Կան Արմինիա վերտառությամբ ղրամներ այս շրջանների խալիֆաների անուններով¹:

Թ դարի երկրորդ կեսից Դվինում սկսում է մի յուրահատուկ շրջան, որը շարունակվում է մինչև Շաղղաղյանների իշխանության վերջնական հաստատումը՝ ԺԱ դարի 20-ական թվականները: Այս շրջանում Դվինը ներկայացնում է հայ-մահմեդական մի քաղաք, որի բնակչությունը խառն էր: Իհարկե միշտ հայերն էին մեծամասնությունը², բայց օտար՝ մահմեդական տարրը մեծ դեր էր խաղում և հաճախ ազդում էր քաղաքի ճակատագրի վրա: Աշոտ Ա-ը չձգտեց խորտակել օտար տարրի ուժը՝ քաղաքում և այն իր մայրաքաղաքը դարձնել: Ահա այստեղից է սկսում այն դժբախտ շրջանը, երբ Դվինը ոչ վերջնականապես մաս կաղմեց հայոց թագավորության և ոչ էլ միանգամ ընդմիշտ նրանից կտրվեց:

Թ դարի 80-ական թվականներից մինչև ԺԱ դարի 20-ական թվականները Դվինը մոտավորապես 20 անգամ ձեռքից ձեռք անցավ:

869 թ. Աշոտ Բագրատունին հռչակվեց թագավոր Հայոց³ իշխանների և եկեղեցու կողմից, բայց խալիֆայի կողմից հաստատվեց միայն 886 թ.: Նույն ժամանակ նրան թագ ուղարկեց նաև Բյուզանդիայի կայսր Վասիլ Ա-ն:

Նոր թագավորը Դվինում չնստեց: Չնայած այն բանին, որ Դվինը և Ոստան դավառը արդեն համարվում էին Բագրատունիների կալված⁴, Աշոտ Ա-ը ինչ-ինչ պատճառներով չնստեց Դվինում և նստավայր ընտրեց իր բուն կալվածներում՝ Բագրատնում: Աշոտ Ա-ի այս քայլը չդիտենք ինչպես անվանել՝ ճակատագրական սխալ, թե ժամանակի պահանջ: Մի բան պարզ է, որ սրա հետևանքով ուժեղացավ օտար տարրի ազդեցությունը Դվինում և առաջացան այն մեծ բարդությունները, որոնց երկար շարքը կաղմում է Դվինի խառնաշփոթ պատմությունը Թ դարից մինչև իր կործանումը (ԺԳ դ.):

Օտար ամիրաները, որոնք Հայաստանի ղանաղան մասերում հաստատվել էին, առիթ էին որոնում, որպեսզի որևէ մասում իշխանություն ձեռք բերեն: Այսպիսի բախտախնդիրներից էին Հովհաննես կաթողիկոսի հիշատակած Լուկու եղբայրներ՝ Մահմեդը և Ումայյին (Մուհամմադ և Ումայյա): Նրանց ծաղումն անհայտ է: Պատմագիրը նրանց անվանում է «ղլխուր ոստիկանը և հրումանատարը քաղաքին»⁵:

Այս երկու եղբայրները Դվինում հաստատվել էին հավանաբար կամ Աշոտ Ա-ի իշխանության վերջին տարիներին, կամ Սմբատ Ա-ի իշխանության առաջին տարիներին, նրա և իր Աբաս հորեղբոր միջև տեղի ունեցած վեճի ժամանակ: Նրանց և թագավորի միջև կար համաձայնություն՝ հնազանդության և ծառայության մասին: Օղտաղործելով այն առիթը, որ Ատրպատականի ոստիկան Աֆշինը սպառնալի դիրք էր բռնել Սմբատ Ա-ի նկատմամբ,

¹ В. Тизенгаузен, Монеты Восточного Халифата, СПб, 1873, էջ 323—324:

² Ալ-Խարաթի, Bibl. Geogr. Arab., pars I, էջ 188:

³ Բ. Аракелян, Гарни (I), Ереван, 1951, էջ 84—87:

⁴ Opus Geographicum auctore Ibn Haukal, ed. J. H. Kramers, Lugd. Batav., 1930, v. II, էջ 343:

⁵ Յովհաննես կաթողիկոս, Պատմութիւն, Երուսաղէմ, 1867, էջ 202:

երկու եղբայրներն աստամբովում են: Սմբատը գալիս է և սլաշարում քաղաքը: Նրանք փորձում են փախչել, բայց բռնվում են և Սմբատի կողմից շրջափակված ուղարկվում կայսեր: Այս վերջին քայլն անհասկանալի է, որովհետև Դվինի ամիրանների աստամբությունը ոչ մի առնչություն չունեն կայսրության հետ և վերաբերում էր Հայոց թագավորության, որը սլաշտոնապետ դեռ կապված էր խալիֆայության հետ:

Խեղդելով Դվինի աստամբությունը, Սմբատ Ա-ը հնարավորություն ունեցավ ղսպելու աստամբներին երկրի բոլոր մասերում, վերանվաճելով այն նահանգները, որոնք իր հոր ժամանակ ենթակա էին Բագրատունյաց իշխանության: Հետաքրքրական է այն, որ նա այս բոլորը նվաճեց միայն Դվինին տիրելուց հետո: Ահա այստեղ է երևում այն կարևոր դերը, որը կարող էր խաղալ Դվինը Հայոց թագավորության միասնականության սահմանման գործում:

893 թ. տեղի ունեցավ Դվինի երկրորդ մեծ երկրաշարժը, որի մասին խոսում են թե՛ հայ (Հովհաննես¹), թե՛ արաբ (Իբն ալ Ասիր²) պատմագիրները: Կործանվեցին ս. Գրիգոր Կաթողիկոս եկեղեցին, կաթողիկոսարանը և Յիզտբուղիտի վկայարանը³:

2. ԴՎԻՆԸ ՍԱԶՅԱՆՆԵՐԻ ԻՇԽԱՆՈՒԹՅԱՆ ՏԱԿ (894—929)

Ա—894—901 թթ.

889 թ. Աբուլ-Սաջ Դեղադի որդի Մուհամմադ Աֆշին նշանակվեց Ատրպատականի ոստիկան: Նկատի ունենալով, որ Հայաստանն այլևս չէր կառավարվում ոստիկաններով, նրա հարկերի Բաղդատ փոխանցումը հանձնարարվեց Մուհամմադ Աֆշինին: Այս վերջինս առիթ էր որոնում միջամտելու Հայաստանի ներքին գործերին: Սմբատի դաշինքը կայսրության հետ Աֆշինին առաջին առիթը տվեց միջամտելու, բայց հարցը վերջացավ խաղաղությամբ: Ինչպես տեսանք, խեղդելով Դվինի աստամբությունը Սմբատ Ա-ը երկու աստամբ եղբայրներին շրջափակված ուղարկեց Բյուզանդիայի կայսեր: Դվինի աստամբությունը տեղի ունեցավ այն ժամանակ, երբ Սմբատ Ա-ը նոր էր վերադառնում Աֆշինի հետ Արաքսի հովտում հանդիպելուց և միայն Դվինի աստամբությունը ճնշելուց հետո է, որ Աֆշինը հարձակվում է Հայոց վրա: Հավանաբար որևէ կապ պետք է լիներ Դվինի ամիրանների և Աֆշինի միջև: Չէ՞ որ նրանց հասարակաց թշնամին Հայոց թագավորն էր:

Ըստ Հովհաննես կաթողիկոսի, Աֆշինը չի կարողանում հանդուրժել Սմբատ Ա-ի հաջողությունները աստամբ նախարարներին ճնշելու գործում և որոշում է հարձակվել⁴: Նա մտնում է Արաքսի հովիտը և առանց դժվարության գլուխում նախճափանը և Դվինը: Այդ քաղաքների մահմեդական տարրը միշտ պատրաստ էր հանձնվելու Ատրպատականի ամիրաններին:

¹ Յովհաննես, էջ 204:

² *Ibn al-Athir*, ed. C. J. Tornberg, 1871, v. VII, էջ 323:

³ Յովհաննես, էջ 204:

⁴ Ղաֆադարյան, Դվին քաղաքը և նրա պեղումները, Երևան, 1952, էջ 109 և 119: Յովհաննես, էջ 210:

Այդ օրվանից սկսում է Դվինի պատմության մեջ մի նոր շրջան: Դրանից հետո, մինչև Գաղիկ Ա (990—1020) Գողթն — Նախճավան — Դվին հատվածը մնում է մահմեդական տիրապետության տակ և ոչ մի Բագրատունի թագավորի չի հաջողվում վերջնականապես նվաճել այն: Մոտ հարյուր տարի տևող այս շրջանում, ոչ մի հաստատուն իշխանություն չգոյացավ Դվինում: Անընդհատ իրար էին հաջորդում զանազան իշխանություններ: Ընդհանուր բառով, մահմեդական իշխանությունը Դվինում անվանվում է ամիրայություն: Բայց դա նման չէր մեզ ծանոթ այլ ամիրայություններին (օր. Մանազկերտի կամ Բիֆլիսի ամիրայությունները): Այստեղ, հենց քաղաքում, ժառանգաբար չէր իշխում ոչ մի իշխանական տուն: Նա ինքնուրույն չէր, այլ պարզապես մի հենարան էր Ատրպատականի ամիրայությունների համար Հայաստանի ներքին գործերին միջամտելու: Ուստի այդ հենարանի ոչնչացումը Հայոց թագավորության ապահովության առաջին պայմանն էր:

Մինչև իր մահը (901) Աֆշինը հաճախ անձամբ լինում էր Դվինում և այնտեղից միջամտում Հայաստանի ներքին գործերին, օգտագործելով Վասպուրականում տեղի ունեցած խռովությունները: Իր բացակայության ժամանակ, նա, հավանաբար, քաղաքում թողնում էր որևէ մեկին որպես կառավարիչ: Վերջին անգամ Դվինից հեռանալուց նա թողեց իր որդուն՝ Դեդադին և մեծ ներքնապետին¹:

Հենց որ լսում է իր հոր մահը, Դեդադը վերադառնում է Աստրախան: Բայց նրա հորեղբայրը՝ Յուսուֆը նրանից խլում է իշխանությունը:

Բ. — 901—919 թթ.

Այս շրջանում Յուսուֆը Դվինը դարձրեց իր բոլոր գործողությունների հենարանը: Այստեղ է նա բանտարկում իր ձեռքն ընկած հայ իշխաններին, նույնիսկ Հովհաննես կաթողիկոսին: Այստեղ բերեց նաև Սմբատ Ա-ին և խաչի վրա ցուցադրեց նրա դիակը: Սմբատի պարտությամբ փշրվեց Աշոտ Ա-ի հիմնած թագավորությունը: Սաջյաններին հաջողվեց այդ բանը իրադրոծել Արծրունիների կենտրոնախույս ձգտումների պայմաններում: Աշոտ գահաժառանգը, որը դիմել էր Կասրության օգնությանը, Արևմուտքից վերադարձին փախցնում է իշխանության ձգտող Աշոտ Շապուհյանին, որը հաստատվում է Դվինում: Յուսուֆը վերջինիս տվել էր թագ:

Որպեսզի ավելի ապահով լինի Ատրպատականի կապը Դվինի հետ, Յուսուֆը թույլ է տալիս, որ հայկական Գողթն դավառում հաստատվի մի արար ամիրա²: Այս ամիրայությունը շատ վատ դեր խաղաց Գողթն — Նախճավան — Դվին հատվածում օտար տարրի ամրացման գործում: Անցյալում Նախճավանն Վասպուրականի մասն է կազմել, բայց ահա Սմբատ Ա-ն, ի հեճուկս Գաղիկ Արծրունու, այս դավառը սկսել է Սյունյաց Սմբատին: Սյունյաց ձեռքումն էլ նա երկար չմնաց: Գողթնի բռնավորը խլեց նրանց ձեռքից նաև Նրնջակ ամրոցը և հետզհետե տարածվեց դեպի Նախճավան: Սաջյանների իշխանության ժամանակ Գողթնի ամիրան ենթակա էր Ատրպատականին և այսպիսով ստացվում է մի սեպ՝ Գողթն—Նախճավան—Դվին: Այս սեպը, որը խրվել էր մինչև

¹ Յովհաննէս. էջ 234:

² Նույն տեղում, էջ 384:

Այրարատ, կարևորագույն խանգարիչ ազդակներից մեկը հանդիսացավ Հայոց միացյալ թագավորության պահպանման գործում:

Դ—919—922 թթ.

919 թ. Յուսուֆը, որն ապստամբվել էր խալիֆայի դեմ, գերի ընկավ: Նրան հաջորդեց իշխանության մեջ Սրուբ (Սուբուբ) անվամբ մեկը Ատրպատականի մեծամեծներից: Սա իրեն դեռ թույլ զգալով, լավ հարաբերություններ է հաստատում Աշոտ Բ-ի հետ խալիֆայի կողմից նրան տալով Շահան-Շահ տիտղոսը: Սրբբը կարճ մնաց իշխանության մեջ, որովհետև, երբ 922 թ. Յուսուֆը բանսից ազատվեց, Սրուբն արդեն մահացել էր:

Իհարկե, Սրուբի այս բարեկամական քաղաքականությունը նպաստավոր չէր Աշոտ Շապուհյանին: Ահա այդ ժամանակ է, որ Աշոտ Բ-ը հարձակվում է Դվինի վրա, որտեղ նստում էր իր հակառակորդը: Վերջապես Հովհաննես կաթողիկոսի միջնորդությամբ երկու Աշոտները իրար հետ հաշտվում են և միասին ընկճում քաղաքի օտար տարրի դիմադրությունը: Հովհաննես կաթողիկոսը պրոտ է, որ «զմուլորութիւն պաշտօնէիցն հեթանոսաց յինքեանս գրաւեալ ընդ ձեռամբ նուաճէին»:

Հայտնի չէ, թե ինչքան ժամանակ Աշոտ Շապուհյանը Դվինում մնաց: Հավանաբար նա շուտով վերադարձավ իր կալվածները՝ Բագարան:

Այս շրջանում Բյուզանդիան արդեն ինչ ինչ պատճառներով արշավանք է կազմակերպում Դվինի դեմ: Իհարկե Հայոց թագավորությունը օգնություն չէր խնդրել Կայսրությունից, բայց ակներևաբար վերջինս առիթը եկած համարելով դեպի Արևելք ծավալվել, ուզում էր, որ խալիֆայության դեմ ուղղված աշխատանքներից մի քանիսը երբեմն ուղղվեն նաև դեպի Հայաստան: Կոստանդին Միրանաժնի մոտ, այս բանը հստակ կերպով երևում է:

915 թ. օգնության փոխարեն Կայսրությունը նույնիսկ իրավունք էր վերապահում Բաղրատունի թագավորներին իրեն ենթակա համարելու: Միրանաժինն ասում է, որ Ռոմանոս Լեկապենոսի ժամանակ (919—944) Դվինի դեմ արշավանքի ուղարկված Հովհան Կուրկուասն իր ճանապարհին անապատացիներից ամբողջ Բասենը որպես տրաքներին ենթակա շրջան:

Դվինի դեմ այս արշավանքի մասին խոսում է Ասողիկը «Սա (Ռոմանոսը) չերկրորդ ամի թագաւորութեանն իւրոյ գումարեաց զօրք բազում և դեմեսիկոս տաքեաց ի Դուին քաղաք յորում էր Սպքի ամիրայ»¹: Աշոտ Բ-ը որպես Սրուբի դաշնակից, իհարկե կողմնակից չէր 922 թ. այս արշավանքին: Հետաքրքրական է Հովհաննես կաթողիկոսի լուրջությունն այս հայտնի արշավանքի մասին: Բայց նրա մոտ այնուամենայնիվ նկատվում է մի ակնարկություն, որը վերաբերում է հենց այս արշավանքին և խոսում է այն մասին, որ Աշոտ Բ-ից ապրտամբած իշխան Ամրամը գաղտնի կապեր ուներ Կուրկուասի հետ: Հովհաննես կաթողիկոսի մոտ նրա մասին գրված է, որ «հաճէր հաւանէր մտանել ընդ

¹ Ibn al-Athir, v. VIII, էջ 101:

² Յովհաննէս, էջ 400:

³ Const. Porphyrogenitus, de Ceremoniis. Bonnae, 1829, էջ 686—87: Նույնի՝ О на-
родах, Москва, 1891, էջ 164:

⁴ Rambaud, L'Empire grec au dixieme s., Paris, 1870, էջ 524—27:

⁵ Ասողիկ, Պատմութիւն Տիեզերական, Ս. ՊԲ, 1883, էջ 170:

լծով ծառայութեան անընդհատ Գուրգենայ որ իշխան իշխանաց էր Գամրաց աշխարհին»¹։ Անընդհատ Գուրգենը Հովհան Կուրկուսան է, իսկ Գամրաց աշխարհը Կապադովկիան է։ Եթե սա ճիշտ է, ուրեմն Կալստրոյունն արդեն վտանգավոր դավեր էր լարում Հայոց թագավորության դեմ և նրա պարտությունը Դվինի առաջ փրկեց Աշոտ Բ-ին հետագա քարոզություններից։

Դ—922—929 թթ.

Յուսուֆն ազատվեց բանտից և խալիֆը նրան դարձյալ շնորհեց Ատրպատականը և այլ կուսակալություններ։ Այս անգամ Յուսուֆը Դվին ուղարկեց Նասր ալ-Սուբուքին։ Սա վերսկսեց Յուսուֆի հին քաղաքականությունը Աշոտ Բ-ի դեմ։ Նասր ալ-Սուբուքին պետք չէ նույնացնել Սուբուքի հետ, որն ինչպես տեսանք, Ատրպատականի կառավարիչն էր Յուսուֆի բանտարկության ժամանակ։

Հենց որ հասնում է Նախճավան՝ Նասրը, իրեն դիմավորող Սյունյաց իշխաններին ձերբակալում է և բանտարկում։ Դվին գալուց հետո նա արշավանքներ կազմակերպեց դեպի Այրիվանք և ապա կաթողիկոսի ամառանոցը՝ Բյուրական։ Նրա ժամանակ է, որ Հովհաննես կաթողիկոսը լքում է Դվինի հայրապետանոցը և թափառական կյանք վարում։ Դրանից հետո այլևս ոչ մի հայ կաթողիկոս Դվինում չնստեց։ Արդեն 893 թ. երկրաշարժի ժամանակ կործանվել էին թե հայրապետանոցը, թե ս. Գրիգոր մայր եկեղեցին։ Հայրապետական աթոռի տեղափոխմամբ օտար տարրի դիրքերը ամրապնդվում էին Դվինում։

924 թ. Յուսուֆը հետ է կանչում Նասիրին մի ապստամբություն ճնշելու համար։ Նասրն իրեն փոխանորդ է թողնում Բշիրին։ Վերջինս շարունակում է նույն թշնամական քաղաքականությունը, բայց պարտություն է կրում Գևորգ իշխանից և Աշոտ Բ-ից։ Նորից է գալիս՝ Նասրը և այստեղ իր պատմությունը վերջացնում է Հովհաննես կաթողիկոսը։ Իրն ալ-Ասիրը հիշում է, որ 927/28 թվականներին տեղի ունեցավ Կալստրոյան կողմից մի նոր արշավանք Դվինի վրա, երբ այնտեղ կար, ասում է նա, Նասր ալ-Սուբուքին։ Երկար պայքարից հետո, որի ընթացքում զործածվում են ռազմական մեքենաներ՝ բարաններ և հրափայտական մեքենաներ, հույները պարտվում են և նրանցից 10 հազար մարդ է սպանվում։ Մինորսկին սխալմամբ միացնում է թե՛ երկու անձնավորություններին և թե՛ երկու հարձակումները՝ Դվինի վրա՝ Բայց Ն. Ադոնցը հստակ կերպով տարբերում է ինչպես Սուբուքին և Նասր ալ-Սուբուքին, այնպես էլ երկու հարձակումներն իրարից։

Սաջյանների շրջանը Դվինում և նրանց տիրապետությունը Արաքսի հովտի Գողթն — Նախճավան — Դվին հատվածում սկիզբ դրեց այս գավառների հետագա ապահայացման։ Հայաստանի քաղաքական ապահովության և միասնական թագավորություն ստեղծելու համար անհրաժեշտ էր ոչնչացնել այդ ամիրայությունները և այս բանին ձգտեցին զրեթե բոլոր Բագրատունի թագա-

¹ Յովհաննէս. էջ 401։

Տե՛ս N. Adontz, Asot Erkat ou le Fer, Annuaire, de l'Inst. de Phil. et d'Hist. Orientale, III, Bruxelles 1935.

² Ibn al-Athir, v. VIII, էջ 120։

³ V. Minorsky, Studies in Caucasian History, London, 1953, էջ 119—120։

⁴ N. Adontz, նույն տեղում։

վորները: Բայց դժբախտաբար չհաջողվեց վերջնականապես ոչնչացնել նրանց նույնիսկ Գազիկ Ա-ի ժամանակ, ինչպես հետո կտեսնենք:

Սաջյանների ժամանակ Դվինում կտրվում էին դրամներ թե՛ խալիֆաների, թե՛ Սաջյանների անուններով: Այսպիսի դրամներ էին կտրվում նաև Պարտավում (Բարդաա):

3. ԽԱԽՆԱԿ ԾՐՁԱՆ (929—941)

Այս շրջանը խառն է թե Ատրպատականում, թե Դվինում: Հայաստանում այդ ժամանակ իշխում էր Աբասը (928—953), որը Սմբատ Ա-ի և Աշոտ Բ-ի խռովահույզ շրջանից հետո իշխեց համեմատաբար խաղաղ: Բայց նա շունեցավ պետք եղած հիմք, առիթից օգտվելու և գրավելու Արաքսի հովտի այս կարևոր հատվածը, որը գտնվում էր օտարների ձեռքում:

929—937 թթ. Ատրպատականում իշխում էր Յուսուֆի ստորագրյալներից Մուֆլիհը: Թովման նրան և նրա հաջորդներին արհամարհաբար անվանում է «որդիք աղախնեաց և ծառայից տանն Ասուսաճայ»¹:

Իբն ալ-Ասիրը վկայում է, որ 317 հիջրի թ. (929/30) Մուֆլիհը բախվեց Դոմեստիկի հետ և հաղթեց նրան: Որտե՞ղ կարող էր տեղի ունենալ այդ բախումն Ատրպատականի ամիրայի և Հովհան Կուրկուասի միջև, երբ երկուսի մեջտեղում գտնվում էր Հայաստանը: Իբն ալ-Ասիրը հիշում է նաև մի այլ բախում, որը տեղի է ունեցել 319 հ. (931) թ.: Հստ նրան. Գազիկ Արծրունու զորամամր, բյուզանդական զորքերը հարձակվում են Խլաթ, Բերկրի և այլ քաղաքների վրա և կոտորում մահմեդականներին²: Այս լուրն առնելով Մուֆլիհը հարձակվում է Վասպուրականի վրա: Ուստի, Մուֆլիհի նախկին արշավանքը նույնպես կարող էր կատարված լինել միայն Վասպուրականի վրայով, և այն էլ հենակետ ունենալով Գողթն—Նախճավան—Դվին հատվածը:

Շփոթություն է ստեղծում Թովման, մոտավորապես 937 թ. Դվինի վրա հարձակված ամիրայի անունը չհիշատակելով: Իհարկե դա Ատրպատականի՝ այդ ժամանակ իրար հաջորդող ամիրաներից մեկն էր, բայց Թովման նրա անունը չի տալիս, որովհետև նա արդեն նախապես (էջ 473) ասել էր, թե նկատի ունենալով, որ հիշատակության արժանի գործ չեն կատարել, ուստի նրանց անունները ինքը չի հիշելու:

Իբն Միսքաուայհը հիշում է Ատրպատականի համար պայքարող ամիրաներից Ալ-Լաշթարի մի ասպատակությունը Վասպուրականի վրա (937/938), որն այդ ժամանակ փախչում էր Դույսամ իրն Իրրահումից (ալ-Քուրդի): Նրան սպանեց Անձևուցյաց Ատոմը (որդի Գուրգենի)³: Չգիտենք արդյոք նա մտավ Արաքսից այս կողմ Գողթն—Նախճավան—Դվին հատվածը թե չէ:

Դույսամն Ատրպատականում իշխեց (առաջին անգամ) 937—41 թթ.: Այս շրջանում Դվինը հավանաբար նրա իշխանության տակ է գտնվում: Լենինդրա-

¹ P. Դասեր, О монетах Саджидов. Изв. Общ. общ. и изуч. Аз., Баку, 1927, № 5.

² Թովմայ, էջ 473:

³ Ibn al-Athir, v. VIII, էջ 159:

⁴ Ibn al-Athir, v. VIII, էջ 173:

⁵ Թովմայ, էջ 487—80:

⁶ Ibn Miskawaih. (Amedroz H. F. and Margoliouth D. The Eclipse of the Abbasid Caliphate գրքում, Oxford, 1920), p. I, էջ 401—403:

դի էրմիտաժում կա մի դրամ, 330 հ. (941/42) Արմինիա վերտառությամբ, որն ըստ դրամագետ Ա. Բիկովի, Դվինում է կտրված¹։ Դրամի վրա կա իսլամական անունը՝ Ալ-Մուտտակի և նրա անունը՝ Դայսամ իբն Իբրահիմ։

4. ՍԱԼԱՐՅԱՆՆԵՐԻ ԻՇԽԱՆՈՒԹՅՈՒՆԸ ԴՎԻՆՈՒՄ (941/2—987) (ԸՆԴՄԻՋՈՒՄՆԵՐՈՎ)

Ա—941/2—948

Սալարյան Մարզուբան իբն Մուհամմադ իբն Մուսաֆիրը (941—957), հաղթելով Դայսամին, տիրացավ ամբողջ Ատրպատականին և Արաքսից այս կողմ գտնվող Անդրկովկասի երկու մեծ քաղաքներին, որոնք էին Պարտավը և Դվինը²։ Սակայն 948 թ. կովի բռնվելով Բույի (կամ Բուեյհի) տիրակալներից Ռուքն ադ-Դինի հետ զերի ընկավ և մնաց բանտում 948—954 թթ.։

Բ—948—951 թթ.

Մարզուբանի զերի ընկնելով Ատրպատականին տիրացավ Բույի զորավարներից Մուհամմադ իբն Աբդ առ-Ռազզակը։ Այդ ժամանակ Մարզուբանի եղբայրը՝ Վահսուդանը ազատ արձակեց Դայսամին, որը բանտարկված էր (937—948)։ Դայսամն իր շուրջը հավաքեց քրդերին և դայլամիներին և սկսեց ուժեղ սլաքար մղել Ատրպատականին տիրանալու համար։ Իբն Միսթաուայհը հիշում է, որ Մարզուբանի բանտարկվելուց հետո Դվինը և Նախճավանը դրավել էին ալ-Ֆադլ իբն Ջաֆար ալ-Համդանին և Իբրահիմ իբն ալ-Դարբինի։ Վերջինս Մարզուբանին մոտիկ անձնավորություն էր և Դայսամին թշնամի։

Սակայն Դայսամը վերադարձվում է Մարզուբանի բոլոր հողերը, ինչպես նաև Նախճավանը և Դվինը ու բանտարկում Իբրահիմ իբն ադ-Դարբին։

Դ—951—954 թթ.

Դայսամի երկրորդ իշխանությունը ուժեղ չի լինում, որովհետև նրա դեմ սլաքար են սկսում զանազան թշնամիներ Ատրպատականում։ Իսկ Դվինում այդ ժամանակ հայտնվում է մի նոր տիրակալ։ Դա Մուհամմադ իբն Շադդադն էր, առաջին Շադդադյանը։ Նա 951 թ. գրավեց քաղաքն առանց դիմադրության։

Սալարյանները նրա դեմ խիստ սլաքար են սկսում։ Իբրահիմ իբն Մարզուբանը զրգոում է Դերմուսի տիրոջը, ասլա ինքն է զորք ուղարկում, բայց իլուրի 953 թ. Աշոտ Գ-ն կամենալով օգտվել այս վիճակից, հարձակվում է, բայց նա էլ չի կարողանում դրավել քաղաքը։

¹ А. Быков, Дайсам ибн Ибрахим ал-Курди и его монеты Эпиграфика Востока, X, 1955.

² Սալարյանների շրջանի մասին տե՛ս Ա. Տեր-Ղևոնդյան, Դվինը Սալարյանների ժամանակ ԳԱ Տեղեկագիր. 1936, № 12։

³ Իբն Միսթաուայհ, Նույն տեղում, ք. II, էջ 129։

Դ—954—957 թթ.

954 թ. Մարզուբանն իր մոր և բանտից նոր փախած Իբրահիմ իբն ադ-Դարբիի օգնությամբ փախչում է բանտից: Նա զորք է ուղարկում և գրավում է Դվինը¹:

Ինչպե՞ս էին Սալարյանները Դվինը կառավարում: Պարտավի մասին Իբն ալ-Ասիրը հիշում է, որ 944 թ., երբ ուսնեբն ասպատակեցին Կուրի հովիտը և հարձակվեցին Պարտավի վրա, նրանց դիմագրեց Մարզուբանի փոխանորդը, այսինքն նրա կողմից նշանակված կառավարիչը: Գուցե Դվինում էլ նստում էր մի այսպիսի կառավարիչ: Մի բան պարզ է, որ Դվինում ժ. դարում երբ անընդհատ իրար էին հաջորդում տիրակալները, ստեղծվել էր մի վիճակ, երբ անիշխանության դեպքում քաղաքը կառավարում էր մեծամեծներից կազմված մի ավագանի, որը ձգտում էր ապահովել առևտրական այս կարևոր կենտրոնի անվտանգությունը: Քաղաքի մեծամեծների մեջ մեծ դեր պետք էր խաղացած լինեին մահմեդական տարրը, որի վրա էլ հենվում էին օտար նվաճողները:

Ժ. դարում Դվինում մահմեդականների թիվն այնքան շատ է եղել, որ մատենագիրները նույնիսկ հիշում են այն կրոնական հոսանքները, որոնց պատկանել են նրանք²:

Դվինի, Նախճավանի և Գողթնի մահմեդական բնակչությունը եղել է հիմնականում արաբ և իրանական տարրերից (դալլամի, քուրդ և այլն): Իբն Հաուկալը հիշում է, որ Հայաստանում և Ատրպատականում պարսկերեն և արաբերեն էին խոսում³:

Դվինում դեռ մինչև հիմա մզկիթի հետք չի հայտնաբերված: Կարծվում է, որ կաթողիկոսարանը 893 թ. երկրաշարժից հետո վերածված է եղել մզկիթի⁴:

Ե—957—966 թթ. (մոտավորապես)

957 թ. մեռավ Ատրպատականի ամիրա Սալար Մարզուբանը և Ատրպատականն ընկավ խառնակ վիճակի մեջ: Այս շրջանի մասին դժվար է ասել մի վերջնական խոսք, որովհետև չկան հստակ տեղեկություններ: Մինորսկին⁵ կարծում է, որ Դվինը այս շրջանում շարունակել է մնալ Սալարյանների իշխանության տակ, որովհետև ըստ նրան այնտեղ հաճախ գտնվել է Իբրահիմ իբն Մարզուբանը: Սակայն այս հարցում նրա միակ աղբյուրի՝ ԺԱ. դարի արաբ պատմագիր իբն Միսքաուայհի փաստերը մեզ չեն համոզում, թե Իբրահիմը հենց Դվինում է եղել: Պատմագիրը հաճախ ասում է, որ Իբրահիմը Ատրպատականից գնաց Արմինիա: Ժ. դարում արաբ պատմագիրների համար Արմինիան նշանակում է ընդհանրապես արաբական նախկին Արմինիա կուսակալության որևէ մի մասը, բայց մասնավորապես երկու բան՝ Բագրատունյաց թագավորությունը և կամ՝ Արծրունյացը: Այս վերջինիս համար իբն Միսքաուայհը ոչ մի անգամ չի օգտագործում Վասպուրական բառը, այլ միշտ

¹ Մունաջջիմ Բաշու այս հատվածի թարգմանությունը տե՛ս Ա. Տեր-Ղևոնդյան, Նույն տեղում, էջ 82—83:

² Ալ. Մուկադդասի, Bibl. Geogr. Arab., p. III, էջ 378:

³ Իբն. Հաուկալ, Bibl. Geogr. Arab., p. II, էջ 250:

⁴ Կ. Ղաֆաղարյան, Դվին քաղաքը և նրա պեղումները, Երևան, 1952, էջ 120—122:

⁵ V. Minorsky, Enc. oi Isl., Musafirids.

ասում է Արմինիա, իսկ Դվինի համար նրա մոտ կա Դաբիլ բառը։ Որպեսզի համոզվենք, թե Արմինիա ասելով պատմագիրը հասկանում է Վասսուրական և ոչ թե Դվին, վերցնենք հետևյալ հատվածը. «Եվ Իբրահիմը փախավ Արմինիա, իսկ Ջուստան իբն Շարամզանը նրանից մոտիկ էր գտնվում և տիրացավ նրա զորքի ճամբարին, գրավեց Մարաղան և կցեց Ուրմիային»¹։ Պարզ է, որ այստեղ Արմինիան որպես Դվին հասկանալու ոչ մի հիմք չկա, ինչպես անում է Մինորսկին։ Այս նույնը կարելի է ասել նաև մյուս դեպքերի մասին, երբ հեղինակն օգտագործում է Արմինիա բառը։

Այսպիսով, եթե Դվինը այդ ժամանակ չէր գտնվել Իբրահիմի ձեռքում, ապա ո՞վ էր այնտեղ իշխում։

Մեզ հայտնի է Աշոտ Գ-ի՝ Դվինը գրավելու մի փորձը 953 թ. երբ Մարզուբանը գտնվում էր բանտում։ Հավանական է ենթադրել, որ Աշոտ Գ-ն այս փորձից հետո 957—966 թթ. դարձյալ կարող էր փորձած լինել գրավել Արաքսի հովտի այս կարևոր հատվածը, որի մեջ մտնում էր Դվինը։ Նա կարող էր բավարարված լինել միայն այս բոլորի վրա ընդհանուր գերիշխանությունը, չջնջելով Դվինում հաստատված մահմեդականների իշխանությունը։ Դժբախտաբար հայ պատմագիրները բոլորովին չեն խոսում այդպիսի մի արշավանքի մասին, ուստի այս շրջանի մասին վերջնական խոսքը դարձյալ կարոտ է նոր փաստերի։

9—966 (մոտավորապես)—982 թթ.

966 թ. Իբրահիմ իբն Մարզուբանը, հաղթելով իր հակառակորդներին, Ատրպատականին տիրացավ։ Նա մեռավ 983 թ.։ Սակայն 976 թ. սկսում է նրա իշխանության թուլացման շրջանը։ Հավանական է, որ նրա իշխանությունը թուլանում է նաև Արաքսի հովտի Գողթն—Նախճավան—Դվին հատվածում էլ։ Ասողիկը, երբ հիշում է 982 թ. սկսած դեպքերի շարքը, Դվինի մասին խոսում է որպես Սալարյան կալված։ Երբ այդ դեպքերը սկսում են, Գողթնի ամիրան Աբու Դուլաֆը (Ապու Տուլաֆ) հանդես է գալիս այնքան ուժեղ, որ նա վախ է ազդում թե՛ Ատրպատականի ամիրային, թե՛ հայոց Սմբատ Բ-ին։ Հավանական է, որ նա այս շրջանում արդեն իր ազդեցությունը տարածած լիներ նաև Դվինի վրա։

Կեկավմենոսի հարցը

Բյուզանդագետ Վասիլևսկին իր մի հոդվածում² խոսում է բյուզանդական մի ձեռագրի մասին, որի հեղինակն է ԺԱ դարի մի պատմագիր։ Վերջինս, ըստ Վասիլևսկու, Դվինի մասին հետաքրքրական փաստեր է հաղորդում։ Նրա պատճառով՝ Կեկավմենոսը Հայաստանի իշխաններից է և Դվինի շրջանի իշխան։ Դաշնակցելով մի այլ իշխանի հետ, նա խաբեություն փորձում է գրավել Դվինը մի ուրիշից և իսկապես նրան հաջողվում է այս բանը։ Պատմագիրն այն համարում է թշնամական գործողություն Կայսրության նկատմամբ։ Վա-

¹ Իբն Խարաույհ. *Նույն տեղում*, Բ. II, էջ 181։

² В. Васильевский, *Советы и рассказы византийского боярина XI в.*, Журн. Мин. Нар. Прос. 1881.

սիլևսկին Դվինի պատմության մասին երկար մտորումներից հետո գալիս է այն եզրակացության, որ այն անձը, որի հետ դաշնակցում է Կեկավմենոսը, և ուցե Սալարյան Աբուլ-Հայջա իբն Իբրահիմն է, որը 982 թ. գրավում է Դվինը և մտնում Սմբատ Բ-ի թագավորությունը։ Բայց այստեղ կասկածելի է, որ խնդրո առարկա քաղաքը հենց Դվինն է, որովհետև հեղինակն այն նկարագրում է հետևյալ կերպ. Ամրոցը գտնվում է մի բարձր վայրում, ունենալով իր վերևում ընդարձակ մի հարթավայր, որտեղ բերդի բնակիչները հնարավորություն ունեն ցորեն ցանելու և արածացնելու արջառը։ Նա ամեն կողմից շրջապատված է ժայռերով և խոր-խորատներով, այնպես որ նրան մերձենալու համար կա միայն մի նեղ ճանապարհ... և այլն։ Դվինին ծանոթ ամեն ոք կարող է պարզ կերպով ասել, որ այս լեռնային ամրոցը երբեք չէր կարող լինել ընդարձակ Դվին քաղաքը, որը գտնվում է հարթավայրում։

Հեղինակն ասում է, որ Վասիլ Բ-ի իշխանության սկզբում (Ժ դարի 80-ական թթ.), երբ նա սկսեց պայքարել բուլղարների դեմ, այս Կեկավմենոսը Հելլադա նահանգում բարձր պաշտոն ուներ, իսկ վերոհիշյալ դեպքերը տեղի էին ունեցել դրանից առաջ մոտավորապես 70-ական թվականներին։ Հավանական է, որ այս ամրոցը գտնվի Արևմտյան Հայաստանի այն մասում, որտեղ կային Բյուզանդիային ենթակա մահմեդական ամիրայություններ։

է—982—987 թթ.

Այս հինգ տարվա դեպքերը հստակ կերպով չարագրված են Ասողիկի մոտ¹։ Ատրպատականում մի սալարյան ամիրա Սմբատ Բ-ի եղբոր Կարսի Մուշեղի ղրդումով հարձակվում է Հայաստանի վրա, բայց կռվի բռնվելով պարտվում է Աբու Դուլաֆից, որը գրավում է ՎԳԴԻՆ և զամենայն քաղաքս նորա²։ Սա վերջին սալարյանն էր, որ իշխեց Դվինին։

Գողթնի Աբու Դուլաֆը երկար շիշխեց այստեղ, որովհետև 987 թ. հարձակվեց Ռավադյան Աբուլ-Հայջան և դրավեց քաղաքը։

5. ՌԱՎԱԴՅԱՆՆԵՐԻ ԿԱՐՃԱՏԵՎ ԻՇԽԱՆՈՒԹՅՈՒՆԸ (987—988/89)

Քրդական ծագմամբ այս իշխանական տունը չկարողացավ սաջանների և սալարյանների (մուսաֆիրների) նման իր գերիշխանության ենթարկել Արաքսից այս կողմում Առանը և կամ հարկատու դարձնել հայկական փոքր թագավորությունները։ Միայն Աբուլ-Հայջան է, որ գրավեց Դվինը և Սմբատ Բ-ից հարկ վերցրեց²։ Նա մեռավ 988/9 թ.³ և այսպիսով վերջացավ Ռավադյանների հզորության շրջանը։

Սրանով վերջանում է Ժ դարում Ատրպատականի ամիրաների ժամանակավոր տիրապետության շրջանը Արաքսի հովտի Գողթն—Նախճավան—Դվին հատվածի վրա։ Արաք աշխարհագիրների և պատմագիրների մոտ այս հատվածը միշտ էլ համարվում է Հայաստանի մի մասը։ Դժբախտաբար օտար

¹ Ասողիկ, էջ 188—200։

² Նույն տեղում, էջ 188—199։

³ Շիրեֆլի, Ռավադյանների պետության մասին (աղբբ.), Труды Инт-а ист. АН АзССР, XI.

տիրապետության այս շրջանն օգնեց հետազայում օտար տարրի ներխուժմանը:

Հենց որ մահացավ Աբու-Հալիլը, Գողթնի ամիրա Աբու-Դուլաֆը վերագրավեց Դվինը: Այս մասին Ասողիկը, դժբախտաբար, այլ տեղեկություններ չի տալիս:

6. ԳԱԳԻԿ Ա-Ի ԻՇԽԱՆՈՒԹՅՈՒՆԸ

Գագիկ Ա-ի ժամանակ (990—1020) Բագրատունյաց թագավորությունն ապրեց իր վերջին տալու շրջանը: Գագիկն իր իշխանությանը ենթարկեց Հյուսիսային Հայաստանի ինքնագլուխ դարձած բոլոր իշխաններին: Հայ ժողովրդի պատմության ատլասի¹ մեջ ցույց է տրված հայոց թագավորության սահմանները հենց Գագիկ Ա-ի ժամանակ:

Հստակ կերպով ոչինչ ասված չէ պատմագիրների մոտ, բայց պարզ է, որ Գագիկն իրեն ենթարկեց նաև Գողթնի նախնական ամիրային, գուցե և նրա ձեռքից առնելով Դվինը: Լաստիվերտցին հիշում է Դավիթ Դվնացի անվամբ մի հզոր իշխանի, որին Անիի մեծամեծները Հայոց գահն են առաջարկում, այն ժամանակ, երբ Գագիկ Բ-ն ընկել էր բյուզանդացիների ծուղակը: Նա ավելացնում է, որ Դավթի քույրը Գագիկի կինն էր²: Ո՞վ էր այս Դավթը: Նրա անունը հիշում է նաև Ներսես Շնորհալին իր «Հալաբաժոյ ոտանաւոր պատմականաց» աշխատության մեջ, որտեղ Բագրատունյաց թագավորների ցուցակի վերջում Գագիկ Բ-ից հետո ավելացնում է նաև այս Դավթին³: Գուցե Դավթը Գագիկ Ա-ի ժամանակ Դվինի իշխանը եղած լիներ:

Մի բան պարզ է, որ Բագրատունի բոլոր այն թագավորները, որոնք իրենց ենթարկեցին Դվինը (Աշոտ Ա, Սմբատ Ա, Աշոտ Բ, Աշոտ Գ, Գագիկ Ա), շոշոն-չացրին Դվինի մահմեդականների տեղական իշխանությունը: Ահա այս է պատճառը, որ քաղաքն առանց դիմադրության ընկնում էր օտար ամիրաների ձեռքը:

Դվինի համար մղված պայքարն ավանդական ձևով իր արտացոլումն է գտել հայ մատենագրության մեջ: Ըստ այս ավանդության, Մովսես Խորենացին մարդարեանում է, թե Բագրատունիները պետք է տիրեն Դվինին⁴:

Դժբախտաբար Բագրատունիների անդորությունը Դվինում և Ոստան դավառում հնարավորություն չտվեց նրանց մշտական գերիշխանություն ձեռք բերելու նաև Վասպուրականի, Սյունիքի, Խաչենի և այլ նահանգների վրա:

Վրաց Բագրատունիները ձգտելով վրաց հողերի միավորմանը, երկարատև պայքար մղեցին Թիֆլիսի ամիրայության դեմ, բայց այդ պայքարը մղվում էր այլ պայմաններում, որովհետև այս ամիրայությունը կտրված էր մահմեդական աշխարհից, ուստի և նրա ջախջախումն ավելի հեշտ էր:

¹ Ա. Երեմյան. Ատլաս, Երևան, 1932:

² Լաստիվերտցի. Պատմութիւն, 1912, Թիֆլիս, էջ 61:

³ Տաշեան. Յուդակ հայերէն ձեռագրաց, Վենետիկ, 1895, էջ 482:

⁴ Մ. Խորենացույ. Մատենագրութիւնը, Վենետիկ, 1883, էջ 284:

Մ. Այրիվանեցի. Պատմութիւն, Մոսկվա, 1880, էջ 36:

Ալիշան. Այրարատ, Վենետիկ, 1890, էջ 411:

ՇԱԳԻԿՅԱՆՆԵՐԻ ԻՇԽԱՆՈՒԹՅԱՆ ՀԱՍՏԱՏՈՒՄԸ

Գագիկ Ա-ի մահվամբ (1020) վերջացավ Բագրատունյաց հզորության քջանը: Քանի ղեկ ողջ էր Գագիկը, Գանձակի Շաղաղյան ամիրա Ֆադլ Ա-ը (985—1031) կարողացավ միայն Փառխոսի թագավորությունը կիսել Գագիկի հետ: Գագիկի մահվանից հետո, սակայն նա սկսեց իր ծավալողական քաղաքականությունը: Մինորսկին, հենվելով Մունաջիմ Բաշու տվյալների վրա, Գանձակի Շաղաղյանների կողմից Դվինի գրավման թվականը դնում է 1022 թ.¹: Նույն մատենագիրը հիշում է նաև, որ 1027 թ. Ֆադլը կառուցեց մի կամուրջ Արաքսի վրա²:

1021 թ. տեղի ունեցավ մի արշավանք, որը վերջնականապես խախտեց Հայոց դիրքերը Դվինում: Դա ղեկավարեցին (Մերձկասպյան դաշլամիների) արշավանքն էր³, որը Վարգանի մոտ վերագրվում է սելջուկ թուրքերին⁴:

Գագիկ Ա-ի մահվամբ արդեն իսկ, Սյունիք, Գուգարք և այլն ինքնաբերաբար բաժանվել էին Անիի թագավորությունից: Դա երևում է նրանից, որ երբ Կալսրությունը որպես «ժառանգություն» վերցրեց Հովհաննես Սմբատի թագավորությունը՝ վերոհիշյալ նահանգների վրա հավակնություն չունեցավ: Սրանով էլ հեշտացավ նաև Դվինի բաժանումը Անիի թագավորությունից:

ԺԱ դարի 20-ական թվականներին Նախճավանում իշխում է մի ամիրա, որն ըստ հրևույթին ժառանգորդն էր Ժ դարում գոյություն ունեցող Գողթնի ամիրայության: Նրա մասին խոսում է ներբողագիր բանաստեղծ Կաթրանը⁵ իր ոտանավորների մեջ: Դա Աբու Դուլաֆն է, որի անունը մեզ հիշեցնում է Ժ դարի Գողթնի նշանավոր նույնանուն ամիրային: Նրա մոտ Նախճավանում 20-ական թվականներին հյուր է եղել Կաթրանը և ներբողել է նրան:

Այսպիսով, այս ժամանակ Արաքսի հովտի Գողթն—Նախճավան—Դվին հատվածը դարձյալ կտրվում է Հայոց թագավորությունից: Հավանական չէ այն կարծիքը⁶, թե Գագիկ Ա-ի մահվանից հետո Հովհաննես Սմբատի և Աշոտի միջև իշխանությունը կիսելու ժամանակ Դվինն ընկավ Աշոտի բաժնի մեջ: Լաստիվերտցին լուր ասում է, թե Աշոտին տրվեց «գնեքին կողմն աշխարհին, որ հայի ի վերայ Պարսից և վրաց»⁷: Եթե Աշոտն իսկապես Դվինն ստացած լիներ, նրա նման ուժեղ իշխանի ձեռքից Շաղաղյան և Աբուլ-Ասուարը հազիվ թե կարողանար խլել Դվինը: Հավանական է, որ քաղաքի անցումը Շաղաղյաններին կատարվել է լուր կերպով: Երկու եղբայրների միջև վեճի ժամանակ Աբուլ-Ասուարն արդեն քաղաքի տերն էր: Այսպես, գիտենք, որ Ասիրատ իշխանը, որը կապեր ուներ Աշոտի հետ, փախչելով Հովհաննես Սմբատի մոտից, 12 հազար զորքով գալիս է Դվին: Աբուլ—Ասուարը սկզբում մեծարում է նրան, իսկ հետո վախենալով նրա ուժից, սպանում է Ասիրատին: Զգիտենք, Աբուլ-

¹ V. Minorsky, Նույն տեղում, էջ 22:

² Նույն տեղում, արաբ. բնագիր, էջ 11:

³ Հ. Մանանդյան, Հայաստանի պատմությունը թուրք-թաթարական արշավանքների ժամանակ, Երևան, 1922, էջ 28:

⁴ Վարդան, Պատմութիւն, Մոսկվա, 1861, էջ 131:

⁵ Տե՛ս Хаким Катран Табризи, Тавриз, 1947, էջ 11:

Е. Бертельс, Низамн, Москва, 1956, էջ 40:

⁶ Ас. Шахназарян, Двин, Ереван, 1940, էջ 126:

⁷ Լաստիվերտցի, էջ 9:

Ասուարի կասկածը Ապիրատի նկատմամբ իրական հիմք ունե՞ր, թե չէ։ Գուցե Ապիրատը իսկապես երազեր գրավել Դվինը։

Շաղապյանների իշխանությունը Դվինում մի նոր շրջան է, երբ այլևս չկային հայ Բագրատունիները և ոչ էլ Ատրպատականի նախկին ամիրաները, որպեսզի պայքար մղեին Դվինը գրավելու համար։ Սա առաջին իսկական ամիրայությունն է Դվինում, այսինքն մի ժառանգական իշխանություն, որտեղ տիրում էին հենց քաղաքում հաստատված ամիրաները (Աբուլ-Ասուար, Աբու Նասր և այլն)։

Այս նոր շրջանի պատմությունն¹ արդեն կասկած չէ ո՛չ խալիֆայության, ո՛չ էլ Բագրատունիների հետ, այլ մտնում է բյուզանդական, սելջուկյան և հետ-սելջուկյան շրջանների պատմության մեջ։

¹ ՓԱ—ՓԳ դարերի Դվինի պատմության մասին տե՛ս V. Minorsky, նույն տե՛ղում, էջ 40—67, 123—124։